

18/04/2004

Perasuah tiada tempat dalam pentadbiran Pak Lah

Kalimullah Hassan

PADA mesyuarat Kabinet pertama selepas berjaya memimpin Barisan Nasional mencapai kemenangan dalam pilihan raya umum lalu, Perdana Menteri, Datuk Seri Abdullah Ahmad Badawi memberitahu rakan lama dan barunya bahawa beliau mengharapkan mereka supaya sentiasa bertindak dengan jujur.

Sekiranya sepanjang menjalankan tugas ada perkara yang mereka tersilap, beliau berjanji akan berdiri teguh di belakang mereka, demikian yang dikatakan Dr Maximus Ongkili, seorang daripada 14 menteri baru yang dilantik Abdullah ke dalam Kabinetnya, sewaktu mengingati semula detik itu.

Bagaimanapun, jika kesalahan itu dilakukan secara sedar, Abdullah menegaskan, bahawa beliau tidak akan menyebelahi mereka dan menyerahkannya kepada undang-undang.

Inilah yang akan menjadi dasarnya walaupun membabitkan rakan baiknya seperti Datuk Seri Dr Lim Keng Yaik.

Kenyataan itu menyebabkan Dr Lim melolong ketawa begitu juga di kalangan yang lain, jelas Maximus, tetapi semua anggota pentadbiran barunya sedar akan pendirian Perdana Menteri terhadap rasuah.

Hari berikutnya, mesej yang sama diulang semula pada bahagian lain anggota pentadbiran - pembantu Perdana Menteri, Anggota Parlimen, Ahli Dewan Undangan Negeri, Ketua Menteri dan juga Menteri Besar.

Jika masih ada lagi yang menaruh sedikit keraguan terhadap usaha Abdullah menangani gejala rasuah, segala-galanya sudah dibuktikan pada Rabu lalu.

Pada hari berkenaan, seorang rakan karib Abdullah, Datuk Azman Mahalan dituduh di Mahkamah Ipoh atas kesalahan rasuah. Berhubung politik wang membabitkan sejumlah RM7,000.

Politik wang menjadi masalah yang tidak sudah dalam Umno sejak bertahun. Seinggakan bekas Perdana Menteri, Tun Dr Mahathir Mohamad terpaksa merayu, juga menangis pada Perhimpunan Agung Umno 1995 meminta anggota Umno membuang amalan itu dan menganggapnya sebagai perkara keji.

Dalam beberapa kes, laporan mungkin tidak dibuat pada Badan Pencegah Rasuah atau polis. Dalam beberapa kes lain pula, mungkin tiada bukti untuk membawa perkara ini ke muka pengadilan.

Dalam kes Azman, pendakwaraya berasa mereka sudah punya cukup bukti untuk mendakwanya.

Tidak ramai yang tahu hubungan rapat Azman dan Abdullah.

Bekas pegawai Imigresen di Pangkalan Hulu, kampung saya, Azman adalah seorang yang sentiasa ceria dan mudah dibuat kawan.

Adalah sesuatu yang menyukarkan bagi orang seperti saya apabila melihat Azman didakwa kerana beliau adalah rakan baik arwah bapa saya. Ia menjadi lebih sukar bagi Pengarang Kumpulan Berita Harian, Hishamuddin Aun kerana Azman adalah pakciknya.

Walaupun sukar bagi kami untuk melihat gambar Azman disiarkan di muka depan akhbar yang kami kendalikan, ia menjadi lebih sukar kepada Abdullah. Pembantunya memberitahu, peristiwa itu sedikit sebanyak memberi kesan kepada beliau.

Sewaktu Abdullah disingkir daripada Kabinet pada 1987 kerana menentang Dr Mahathir dalam pilihan raya parti, ramai rakan dan penyokong menjauhkan diri dan memencilkan beliau, walaupun Abdullah terus kekal sebagai Timbalan Presiden Umno.

Pada pilihan raya Umno 1993 yang memperlihatkan pengaruh besar Anwar

Ibrahim melebihi segalanya atau sesiapa yang tidak menyokongnya, Azman adalah antara beberapa kerat yang berdiri di belakang Abdullah, walaupun perkara itu bukan sesuatu yang mahu dilakukan semua orang, juga bukannya satu keputusan politik yang dianggap wajar. Beliau menjadi 'rakan menangis' pada pandangan Abdullah.

Sewaktu berbincang dengan pembantunya minggu lepas, Abdullah secara tiba-tiba mengeluarkan tiga batang pen dan menyusunnya sebaris di atas meja. Kawan, polisi dan undang-undang - inilah yang digambarkan bagi setiap batang pen. Katanya kepada pembantunya, ketiga-tiga ini tidak sama, menunjukkan bahawa tidak ada apa yang boleh beliau lakukan.

"Beliau adalah rakan, rakan sejati saya," sesalnya.

Sebelum pilihan raya umum lalu, Pengerusi DAP, Lim Kit Siang menanyakan pandangan saya sebagai orang surat khabar terhadap keseriusan Abdullah dalam menghapuskan gejala rasuah.

Saya katakan bahawa beliau serius. Sangat serius sehinggakan kawannya juga takut untuk melepasi garisan itu kerana mengetahui tidak akan ada pembelaan terhadap mereka.

Sewaktu menteri Kabinet, Tan Sri Kasitah Gaddam bertemu Abdullah sebelum beliau dituduh rasuah pada Februari lalu, Perdana Menteri meminta beliau membersihkan namanya di mahkamah.

Dalam kes Azman, Abdullah berdoa supaya rakannya itu dapat membuktikan bahawa beliau tidak bersalah.

Doa juga akan menjadi satu-satunya pertolongan yang boleh diharapkan oleh anggota Kabinet Abdullah serta mereka yang terbabit dalam pentadbiran sekiranya disabitkan dengan sebarang salah laku.